

Nu schlächt's aber 13!

Rätsl um Eimstocker Postkartn un Bildle aus alter Zeit! Des war is Thema vun letztm Hutznobnd in März! Dodorzu hatt iech 13 Aasichtn vu Eimstocker Stroßn un Haiser ausgesucht un inner Präsntatsjon – su haaßt des nu mol – zamgestellt un mit den Biemer wieder an de Wand



geschickt. Zevor ham mir aber erscht emol dorklärt, wie mir des Rätsl aagieh wolln: Zweek vu uns mußtn gut aufpassn, wer siech wie in dor Schul als erschter maldn tut, dar kimmt aa gelei dra un kricht ne Wäschklammer.

Warim nu ne ausgerachnt ne Wäschklammer? Of die Wäschklammern zen zamzähl'n for de Gewinner is mei Fraa kumme, die hat siech

grod emol neie eigekaapt. War de meestn Klammern hat, nu dar hat noocherts halt gewunne. Aber do muss ar aa erscht de richtsche Antwort parat ham! Ja, bei mannichn Bildle ging de Roterei ganz schie huch har. Zen Beispiel bei dor Gaststätt Union, die ja ettliche Gahr als Kirch gedient hat, konnt siech Kaaner an den Biergartn dornabn dorinnern – wie dä aa – des is ja schu e ganzis Labnsalter har. Genau esu wußt erscht emol Niemand ewos mit den annern Biergartn vun Cafe Zeun ganz am annern End vun Eimstock aazefange. Oder aa de Aasicht dor Dörfl-Villa vu dor Bargstroß aus is manchn racht schwar gefalln. Ganz schwierig war de Aasicht vu den großn Gebeidkompleks vu ne Bodo seiner großn Fabrik an dor Schneeberger Stroß!

Doch nooch e paar Falschmaldinge in dor Reih kam schließlich allis ins richtsche Lot

– oder besser gesaat – zu de werklichn Stroßname. Siste, is gieht doch, sugar de Gingste unner uns hat do wos rauskricht!

Nooch dor Siecherehring ham mir dann als Rickblick is Fosndwidjo vun letztm Monat gezeichnet, do hatt iech sugar miech selber aageputzt: de Dschiens waggelessn, ne Strumphus naagewirscht, e Strickklaat drierber gezugn un noch ne gammerlich lange Perrick aufgesetzt! Su konntn alle noch emol die schenn Lustichkaatn an siech vorbeizieh lessn. Esu war gelei noch emol ne richtich gute Stimming aufkumme un des Dorzähl'n un Lachn hat bal kaa End gefundn.

Ze guter Letzt hab iech dann noch ne ganz lange Bildle-Schau mit vieln altm Aasichtn vu Alt-Eimstock aafach esu laafn lessn un de Meestn warn dorwagn aa dodorbei ganz bei dor Sach un ham die vieln Aufnahme reglrecht bewunnert un wetter geratslt, is stand ja aa net ieberol dra, was un wus is. Allis in alln: e gelungner Hutznobnd mit vieln Teilnamern – de Sitzgelagnhaatn un is Besteck for de Asserei ham grod esu gereicht...

Bis zen nächsten Hutznobnd in April – e harzlichs Glückauf vun Schmidti

